

四庫全書

集部

欽定四庫全書

石倉歷代詩選卷四百四十五

明 曹學佺 編

明詩次集七十九

李廷美

崇明踏災行

東明海外崇明沙天造地設誠堪誇由唐武德及昭代  
星羅碁布俱人家膏腴萬頃平如掌菽麥禾麻任生長

農夫四序慶有秋  
戍卒頻年樂無恙  
客船漁舫千百艘  
波濤出沒如遊鼇  
鄉氓喜有魚鹽利  
縣令渾無案牘勞  
春風一動陰雲掃  
桃李村村照人好  
帥閫供儲不後期  
京師貢賦常輸早  
民安物阜九百年  
天意胡為忽變遷  
龍爭鯨鬪西灣外  
螭舞蛟潛北渚邊  
長堤巨壑環阡陌  
日就崩頽漫通塞  
鹹潮幾度到城壕  
怪物鮮生食禾麥  
以茲年歲屢不豐  
十室比連九室空  
漁郎罷網悲殘月  
估客停帆怨逆風  
征徭逋負相追逐  
窮鄉徧是逃亡屋

逃亡自棄還自傷半在江南半江北蕭蕭故壘荻蘆秋  
萋萋荒塚蒿萊稠大家門外埋青草古寺基前泛白鷗  
我來觀風長太息歷向人間訪陳迹攜鋤荷篠行且驚  
戴白垂髻走且泣肩輿逡巡三日程滿目淒涼不斷情  
庸醫莫療膏盲疾拙婦難調藜藿羹暮歸默默無奇策  
孤燭熒熒帶愁色湘靈飲恨金徽絕羽客懷仙洞簫歇  
狂來擊碎珊瑚枝陳懷欲訴天翁知女媧頭顱可汗血  
神禹手足須胼胝乃知造化有常理陰陽消長旋終始

山川流峙性本然滄海桑田戲人耳

送楊維新歸四明省親

我昔隱居白雲邊耳聞學士楊大年比來偶爾識丰采  
歸然如睹蓬壺仙雲霄籍籍紛簪組學士才華獨竒古  
史筆渾雄司馬遷詞源浩瀚唐韓愈十年坐對玉堂春  
九重眷顧應殊倫大羹未試調和手陳情暫乞歸寧親  
都城八月秋風早浮雲捲盡天如掃拜寵初辭五鳳樓  
香車便出長安道大通橋頭流水香槐陰細細槐花黃

臨歧酌酒一為別興發不辭歸路長  
畫船錦纜波千頃  
客散風恬醉初醒  
兩岸斜陽萬里情  
半江斜日孤帆影  
行行遙指浙東城  
天際逶迤不斷青  
蘇臺月色吟邊見  
鄞水潮聲夢裏聽  
倚門慈母頭如雪  
宮錦新衣懶不着  
元暉登堂夙願償  
曾參調膳離憂歇  
故山依舊故人疎  
弔古登高思有餘  
重門日暖高軒屨  
曲巷頻迴長者車  
一時遊樂未知極  
轉頭便見梅花白  
海味雖甘久住人  
文星長照東歸客  
吾皇圖治初勵精  
瓦缶毀棄黃鐘鳴

先生欲副蒼生望移孝為忠是別情

送何廷秀之任福建

我聞先生未出仕丹鳳之雛驥之子腹中經史五岳雲  
筆下詞源三峽水早探月窟攀天香春官典禮列帝旁  
金玉持心槿荼節文繡為服蘼鹽腸年來移典秋臺獄  
朗然一朵光明燭平反人疑張釋之果斷時稱包孝肅  
紛紛勢利鴻毛輕公餘半榻和風生小軒可比石渠富  
空庭不減玉堂清狂瀾百折東下疾砥柱中流山屹立

三公八俊少相知五侯七貴誰能識天官冢宰新拜麻  
鑑衡一舉憐才華薦書三上沐俞允歡動吾閩億萬家  
鳳池日暖雨初歇緋袍金帶辭丹闕匹馬驅馳薊北塵  
孤舟蕩漾淮南月吾閩僻在天南邊海濱鄒魯舊相傳  
士有恒心賈有積女勤蠶織男勤田憶從草冠相荼毒  
窮鄉半是逃亡屋野樹風凋柯葉枯水田隄潰蒿萊沒  
天門萬里天不知復有苛政如繭絲金璫赫赫益響震  
玉壺凜凜連顛危我曹濫厠衣冠列閩水閩山久離別



逢人偶說故鄉情  
頓覺愁懷心內熱  
先生于我最相親  
此行百責難重陳  
致君堯舜平生志  
務令八部皆陽春

送趙進士瑤還泉州

識子何不早見子  
即傾倒朝來江上  
送客歸欲行未行  
心草草子行逸思  
何飄飄神仙氣爽  
金玉標去年曾占  
鰲頭選平地走馬  
如丹霄今年召對  
五雲裏萬言一獻  
天顏喜此行深荷  
聖恩饒人生際遇  
曾無幾都門三月  
麗人天軟紅嬌紫  
爭春妍晴雲重遠  
薊北樹暖風獨送

江南船孤帆渺渺帶殘日一雁斜飛去無迹倚蓬翻憶  
新交遊回首金臺猶只尺到家想及紅蕖香四方觀者  
如堵墻固不學相如之歸蜀季子之還鄉亦不學閉門  
脫塵俗舊書更把殷勤讀明年有詔徵還朝早束行裝  
獻荆玉

送鄭大經教授順德為彭鳳儀作

京師三月春熙熙杏花未落楊花飛紫陌紅塵撲人面  
何堪與客相別離念君與我共鄉縣淪交自昔忘貧賤

十年泮水對床眠，萬里雲霄同鷄薦。一從看罷上林春，  
宦海奔波各致身。匡衡抗疏精神倦，劉向傳經事業新。  
年華冉冉同流水，每得君書悲復喜。竭來邂逅未成歡，  
又見青羶逐行李。望中何處是邢臺，百雉層城亦壯哉。  
磁川樹色雲邊見，漳水山光天際開。憐君此去頭尚黑，  
館下諸生肩半白。棟樑榱桷不自成，梗楠梓杞維君擇。  
太邱侍御我所知，年來督學共稱宜。鷺車到日重掄秀，  
定嘆英賢異昔時。

榮壽堂為劉用行二親題

人生無百年光陰如反掌得意功名鮮有終無情白髮  
偏能長何如劉氏美雙親伯鸞德曜堪比倫荷衣蕙帶  
非忤俗褰布荆釵不為貧窮居宴坐長相守朝看雲山  
暮杯酒鹿車不挽階下霜麥舟每繫門前柳膝間產有  
六鳳雛翩翩文采行相呼珍羞曉侍几筵立彩服日向  
庭闈趨箇中一人眉最白青年來作金門客三載秋臺  
凍壑冰一點丹心古厓柏聖皇致理優臣工敦本勸者

行受封奎章宸翰繞紫鳳金函象軸迴飛龍早朝勅下  
麒麟殿一道恩光到鄉縣翠壁紅泉鶴飲乾碧墅香泥  
鹿行徧內江百里俱騰歡出門一笑天地寬隣媪共看  
新寵婦邑人齊拜老秋官華堂初構東溪左四面清幽  
多<sub>闕</sub>可隙地都栽碧色桃閒田盡種金光草世間甲子  
空悠悠星辰右轉水東流願得長繩千萬丈繫住西飛  
紅日頭

題林叔壯壁上飛鳴宿食蘆雁

寒塘九月風蕭索蓮花落盡蘆花白弟兄相聚最多情  
同向塘中戀秋色長空千里雲霧收安巢各有稻粱謀  
飛鳴宿食且適意切莫離羣過別洲

壽林母太安人

碧桃香萱草綠高堂宴坐人如玉紫霞滿酌黃金卮羽  
衣緩舞霓裳曲天涯遊子新歸來白頭一見心顏開烏  
紗視膳登元暉彩服承歡戲老萊自言蔗境日西薄眼  
看三鳳巢阿閣君恩蕩蕩高雲天祖澤綿綿重山岳桑

田滄海幾回春王母麻姑即世人縱然地上多龜鶴那  
似家中有鳳麟

送楊士偉佶充貢赴南畿秋闈

君年十五二十時雄詞健筆人共推功名失意等閒過  
不隨曲學爭奔馳春風吹起冲霄翼承恩賜對金鑾掖  
縱橫禮樂三千言鋪張王道皆忠赤客憲會我正忘情  
書來又向金陵行一尊綠酒沙頭別滿路青雲足下生  
金陵太學人如蟻試問如君能有幾大手須呈五鳳樓

強弓擬發穿楊技，擴齋夫子是吾師。別後蹉跎復歲餘，相逢為問平安否。莫咎疎慵少寄書。

耆英會

正統丁卯同年謝琚王克復龔福滿岳四人

四人三百一十歲，昔日同年今日會。少宰堂中張綺筵，風光迥出塵埃外。兩兩歌童宮樣粧，明眸皓齒聲相配。美酒香茶雨露清，奇花異卉烟霞藹。座中有客稱病夫，濶論高談恣忘愧。醉來環坐空庭中，碧天為幕雲為蓋。侍童初進玉脂酥，宰夫復薦金鱗膾。共言遊樂終此宵。



莫向樽前嗟老大君不見裴度投老歸東都堂開綠野  
名猶在又不見疏廣還家樂賜金只憂孫子生驕怠何  
如留此方寸田不種桑麻惟種艾

又

四人三百一十歲相知始為鹿鳴會後來仕路各飛騰  
半在朝中半江外金犀橫帶謝與王事業功名兩相配  
龔藩白首尚為郎胸襟灑落春雲藹偉哉英達四老成  
用舍行藏總無愧會中同遊更五人惟我庸愚荷遮蓋

竭來宴會少宰堂百味珍羞雜尊膾酒行隨量坐序年  
不偏致身官小大古選新詩首首賡清風明月時時在  
聖恩如海長自深歸來豈為宦成忘祇今居處貴養心  
篋中那用三年艾

遊平遠臺

二十餘年泛海萍古臺名勝始重登身如方外逃虛子  
心似人間有髮僧雁帶寒來紅入葉梅驚秋老綠侵藤  
日斜酒盡山門晚千樹松濤瀉佛燈

烏石山

烏石蜿蜒勢若龍中峰疊出玉芙蓉  
四圍綠繞城邊水幾點青來江上峰  
宋主蒙塵留斷刻唐儒罵賊有遺蹤  
酒闌未盡登臨興僧在翠微敲暮鐘

又和韻

賞春聯騎到南山納納乾坤指顧間  
古碣有文揮鮮看仙巖無路倚蘿攀  
釣龍臺下千艘集演武場中萬馬閒  
自是聖朝多雨露白頭饒許挂冠還

乙卯元夕感懷

滿城燈火雜笙歌老病其如好景何  
愁逐腸迴偏作陣淚從心落欲成河  
風飄香去籠花塢月射窓來照薊窩  
自笑平生最瀟灑不堪今夜寂寥多

哭李和之

少小交遊到白頭忽聞哀訃淚滂流  
孟郊不副韓公望李白空貽杜甫愁  
經學一函傳菽粟詩歌千古戛琳琅  
傷心何處尤堪痛旅櫬迢迢向首邱

送林世增之春闈

郭隗臺前信使還，便攜書劍出閩山。  
濟時功業尊周召，經世文章在孔顏。  
杏苑探花三月裏，楓宸獻玉寸陰間。  
京華若問侗菴老，萬頃雲頭一鶴閒。

送許純嘏之春闈

英妙才華譽四馳，秋風鶚薦上京師。  
太冲久有三都賦，韓愈今無二鳥詞。  
天下名山遊覽日，道傍幽蹟和吟時。  
浮雲富貴何須問，要使香名勒鼎彝。

李廷儀

字鳴鳳號質菴宏治三年進士廷美之弟

春曉詞

繁花落盡鶯聲老汀洲綠徧王孫草  
百尺遊絲拂地輕一爐沈水披香早  
長門深閉金鎖合小殿清幽玉堦掃  
遙見朱衣小隊來隔花低唱風光好

春夜詞

簷鉞鏗風春夢醒紫綾縮脫冰肌冷  
灩灩玉露下空堦半窻月弄庭花影  
含顰起視牛女星春山黛簇秋波凝

闌干倚徧不成寐淒涼何處鉤輈聲

醉歌贈王時彥之京

功名樂少年棲遲淹老醜世事難重陳且飲杯中酒  
燈前快意漫高歌時下朱顏豈常有勸君痛飲君莫辭  
秋風落盡章臺柳古來賢達多不偶腰間寶劍作龍吼  
不用聞嗔里閨兒彼識吾曹是誰否君已醉我未醒起看  
東方明未明摩娑兩眼別君去酒徒誰復長安市

醉漁圖

短簑宿雨晞殘濕一竿深坐磯頭石捲綸歸去踏莎堤  
笠影斜翻半山日紅杏橋邊有酒家將魚換酒不須賒  
醉倒竹根呼不醒夢魂隨月入蘆花

枯木竹石

渴龍飲海海水枯稜撐怪石雲模糊蝸皇不用補天漏  
長留對此珊瑚株珊瑚十丈插雲表氣勢高壓扶桑曉  
晝長清氣寒欲凝一天涼思秋冥冥須臾鳳鳥西飛去  
九疑對面何青青



何處難忘酒

何處難忘酒寒衾夢覺時青銅欺短髮黃菊候歸期翹  
首懷千里論心乏故知此時無一盞何以慰遐私

登虎邱

山寺遙聞白虎蹲望中烟樹小江村臺遊麋鹿歌聲盡  
土蝕雌雄劍氣存霸業已銷無限恨吳宮空弔未歸魂  
憑高向晚孤吟處涼月疎鐘隔水聞

早朝

銀鑰春開虎豹關萬方拜舞玉珊珊  
銀河露濕金莖柱  
寶炬光搖玉笋班  
風落鈞天門左角  
雲扶帝座殿中間  
欲知盛世無為意  
退食夔龍納諫還

### 招寶山

亂峰歷歷送秋烟  
翠島如螺海上連  
重譯南來逢盛世  
逝波東注惜流年  
昔傳方士求仙去  
今見將軍奏凱旋  
絕頂天風發長嘯  
大鵬西擊水如天

### 舟中病起

短欄孤艇倚中流歷歷江山拭遠眸溪影翠搖堤畔柳  
波光晴擁驛邊樓宦途故舊多青眼塵世功名盡白頭  
蓬底纔憐寧寢夜又飛清夢繞皇州

過淨居寺

浙浙西風着敝裘淨居長日水雲幽百年底事空啼鳥  
幾處寒林自送秋白虎遶關山北拱青龍夾道水東流  
肩輿南下重回首身在蓬山最上頭

楊恒叔山堂聽雨限韻

昨夜畢星吾已占朝來雨氣映鬚髯不勞行蟻先移穴  
且聽鳴鳩故傍簾滿地星紅風片委半池鴨綠夜痕添  
偶來一聚逢三益無限餘波醉裏沾

九日錫宴次韻

隱隱鐘聲出景陽傳宣錫宴近清光莫觴共祝無疆壽  
金鼎頻薰百和香內史分糕夸令節諸番入貢自遐方  
鹿鳴天寶賡歌徧擊筑何須說漢王

送陳駿之雷州教

潞潁長歌泊小舸旋收紅葉煮霜螯雷岸今喜君來重  
海國休云路去勞官舍綠屯椰葉暝講堂紅映荔枝高  
天邊作宦憐吾老愁入鄉園首重搔

送人還莆

帝里逢春柳可攀黃塵千丈拂衣還一官莫道是何物  
萬事不如歸故山黃菊喜迎高士醉白鷗今傍主人閒  
木蘭陂上應相待釣艇夷猶水一灣

寶坻道中

足馬蕭蕭踏軟沙官亭駐馬夕陽斜帝城回首三百里  
民瘼關心幾萬家古巷夜深無吠犬新垣月落有啼鴉  
此行莫歎瞻依遠幾度羹牆見舜華

公出南康留別諸廣文

悠悠征旆擁前騶山館清虛且暫休公事已拚三日了  
廣文仍喜一樽留井邊梧葉新凋雨天上星河淡瀉秋  
明發溪頭歎分手離離芳草滿汀洲

懷聶三尹

堂堂歲月去駸駸纔見紅芳又綠陰春草天涯孤客恨  
暮雲江上故人心蠅蝸名利年來淡湖海交情老愈深  
欲整焦桐歌古調半簾疎雨漏聲沈

午飯琉璃寺次韻

沙路逶迤東復南午陰僧寺駐羸驂黃糝淡飯隨時飽  
土俗民情到處諳西嶠迎眸青靄靄晚風吹鬢影參參  
驛亭一夜蕭蕭雨宦况離懷兩不堪

祀張曲江祠

芙蓉疊疊擁梅關  
霜落楓林色正斑  
馬向雲中馳鳥道  
人從海上見仙山  
平時信史歆賢相  
今日雄祠拜古顏  
千載英魂招不返  
悲歌空踏亂雲還

村居散步

杖藜徐步意逍遙  
望裏風烟事事饒  
偶遇腴田思種木  
閒經斷澗欲營橋  
農家傍竹門深掩  
古廟依山字半銷  
何處晚風吹古調  
太平村落醉歸樵

偶成



秋陰漠漠掩重門  
寶鴨香消火尚溫  
南雁不傳沙漠信  
滿庭衰草自黃昏

昭君引

曉承明詔別金鑾  
上馬啼紅玉頰寒  
寄語高壇休拜將  
空憑粉黛博龐安

眠竹逕

小逕疎疎竹幾竿  
春風披拂長琅玕  
日長試展湘紋卧  
一枕蒼雲入夢寒

畫竹

瓊花凍勒蒼龍骨  
法水低淋彩鳳翎  
愁絕英皇渾不語  
九疑相對數峰青

春陰

十日春無一日晴  
玉階芳草傍愁生  
簾門靜掩飛紅亂  
聽盡流鶯自在聲

濯隴圖

濯隴雨晴春水生  
人人驅犢隴頭耕  
太平不在笙歌裏

只聽前村打稻聲

山中酒熟

松花酒熟菊花期  
野老門開對石磯  
便喚鄰翁相對飲  
一簾疎雨看霏霏

送王典史

雲邊驛路天低樹  
蓬底寒聲雁報秋  
記取西風送君處  
離離蘅杜滿芳洲

青郊歸牧

燕草敷榮翠滿墟夕陽歸牧雨晴初清時只唱昇平曲  
牛角何心挂漢書

寄李天瑞

花陰寂寂漏沈沈孤館殘燈別恨深遙憶去年寒食後  
滿天風雨夜同衾

送春

留春無計奈春何滿地鶯聲綠樹多癡蝶紛紛少情思  
尚饗餘馥抱殘柯

楊州逢鄉人

鄉人不識識鄉音  
欲問先看淚滿襟  
豈是不知兒女態  
天涯孤客易傷心

石倉歷代詩選卷四百四十五

欽定四庫全書

石倉歷代詩選卷四百四十六

明 曹學佺 編

明詩次集八十

許天錫

春日偕謝邦實邵仁溥遊烏石山浮觴浴鴈池  
好春無勝遊烟景難再續眷我同心人遊衍紹芳躅南  
尋烏石竒蘿逕窮委曲攀躋初陽峰悠然豁遐矚千山

收雨雲四澤漲春綠天地淨空明烏兔互出沒落花輕  
且閒點點浮紅玉流鶯縱嬌音細草展繁縟連袵俯天  
光洗觴泛醺醖四事偶相宜一醉萬分足昔人哀須臾  
夜遊秉長燭此意誰則知嘯歌山水綠

戶曹鄭汝美李夢陽見過

冰雪消未盡春陽猶作慳沈綿坐遲日曠廢羞清班琴  
樽屏所愛安得有歡顏英曹鄭與李幸此慰間關道言  
淡而馥芳襟偕秉簡回飈披庭樹暝色動遠山開情盡

杯勺向夕惜餘閒出門月皎皎上馬不可攀

君馬黃

君馬黃我馬騮白玉為轡勒黃金裝轡頭腰間何所佩  
琤琤雙純鉤所期在遠道憩息崑崙邱美人恐遲暮駕  
言指東路忽忽生別離踽踽何所遇我馬亦悲鳴十行  
九回顧

休沐示同志

休沐盍同簪朱絃間清竹氛昏豁而開霏屑動盈掬廼



金剛經  
卷四百四十六  
知靜者心往往愛幽獨明月炯虛簷中宵未能宿吾生  
苟有懷詹尹何用卜往者已如斯逝波詎可復脩途考  
初終舊軌存傾覆惟應同心人此意籌已熟

題畫梅

洞江野客半枯槁只有梅花與傾倒蹇驢破帽過南村  
不為梅花被誰惱交情冷淡無人知怪我凌寒起常早  
江頭臘月正月間雲裏十枝九枝好自從作客向天涯  
萬里風烟跡如掃是誰寫此斷腸魂坐對相思令人老

可憐兩度度春光不得香名入詩草今朝試筆為君題  
清淚如絲灑元昊

雨晴邀林清夫飲

十日苦雨一尺泥野人不出甘鹽齏石上苔還太古色  
階前草長如春萐念子長為江海客窮年不得同羹藜  
邂逅歸來始一笑門前高馬碧玉蹄要路權家尚賓客  
馳峰犀筋杯玻瓈前者京城惜君別古槐高柳秋淒淒  
與子幸無一水隔相望何乃成乖睽人情世事多反覆

貧交還似糟糠妻  
晴明遲子過我飲  
只有斗酒兼黃雞  
  
次喬選郎守詠新竹韻

秋山暮雨收銀竹  
白巖軒前月可掬  
開軒見月弄清影  
輒有新詩續淇澳  
翠筠縹節想停雲  
金薤銀枝知奪目  
此君擇地托寸根  
雪擁霜培漸蕃育  
去年崛起纔二三  
今歲旋添餘五六  
不隨凡卉竟滋蔓  
似識衰榮相倚伏  
憶我江頭坐嘯時  
風雨瀟瀟拂茅屋  
別來幾度長兒孫  
回首光陰一何速  
春城滿眼桃李顏  
如對宋朝親衛祝

渴心愛濯君子風  
辛接高林不須卜

題畫用楊京兆亘韻

滄江涵清渚沙白青天去山不盈尺誰傾河漢洗霄氛  
千頃波流浸坤脈松下山人綠髮翁眼前霜根化為石  
壺天曠蕩足棲遲枕穴須臾豈榮適不知楚漢已隨塵  
自分烟霞久成癖一朝沈濯充枯腸萬古乾坤信雙屐  
草木知春自覺秋日出為朝入還夕應憐世上夸毘子  
按轡遲回礙行役不辭白首懷千金欲買青山愛雙壁

我憶洞江烟水村高山為屏草鋪席豈無竹屋三兩間  
亦有烟波舟一隻會須養疴歸去來悵望秋空暮雲碧

題鍾文選雲山圖歌

石屏山人過我遊手携羣峰挈滄洲買我如舟小齋裏  
景象落落乾坤浮江聲撼瑤席山色懸清秋碧樹何渺  
渺白雲空悠悠霏微烟嵐濕不收翠光欲上人衣裘洞  
江先生起梳頭對之不覺宿疴瘳但見翠微人家疎復  
稠石田茅屋莓苔幽小橫橋澗風颭颭無人濯足寒磯

頭磯頭一葉小艇我欲乘之隨長流寧須騎鶴駕蒼  
虬與君鼓枻訪丹丘餐霞飲濯窮冥搜

余使交州得木山于僧寮峰巒竄條堅如巖石  
用梅都官賦木假山韻

萬年木精化青牛瘦骨不朽沈江洲江州水激魚龍秋  
神物始出隨迴流玲瓏律萃誰能鏤山僧得之溪洞首  
蠶方僻遠絕賞鑒木爾韜晦誰怨尤洞江先生好事者  
邂逅願脫千金裘古來琴材出爨下拔爾幸免為人樵

風塵雨谷偕我老無復夢想仍丹邱

楊白花

春宮深春晝長楊花飛舞春雲香隨風忽度江南去萬  
紫千紅俱斷腸離魂渺渺如春水蕩綠楊花幾千里楊  
花流落向天涯宮樹朝鴉復暮鴉

春日掖垣書感

遲日掖垣陰殷憂愧此心禦戎無上策撫事獨長吟花  
柳青春好烟霄紫閣深悠悠空歲月衰白易相尋

往歲

皇華思往歲一騎入雲中  
笛裏愁人月霜前落葉風  
寒川陶戰骨野火燎秋空  
聞道河西寇今來欲向東

居庸關

天設居庸險乾坤此北門  
山川通上郡形勢冠中原  
鐵騎連三戍金城迫九閭  
萬方資阨塞永荷太平恩

月

關山秋夜月南客獨來看  
野迥金波濶風嚴玉兔寒  
不



堪聞戍鼓且未息征鞍孤寡空村裏何時涕泗乾

胡來

胡來青黍盡胡去幕南開日落單于口秋生李牧臺陰  
風吹殺氣戰骨蝕蒼苔洒淚向千古斯人安在哉

九日

客舍黃花節今年花較遲清霜存晚意積雨滯芳時興  
欲謀長醉狂來得好詩緬懷情不盡寥落忽成悲

下詔獄

落照犴門西槐風拂面淒夕葵行蟻散秋草露螢啼捧  
日心還壯看雲首復低居然動幽思何必故園栖

過德州

遲日虹川遠春風錦纜長村明花幾樹河折柳重行漢  
使昭星象周官列職方閒情觸佳景聊為寫詩章

舟中小飲

落日在魚梁逢人問水鄉飛花隨棹遠高柳過樽涼故  
國春無及晴川興且長頻年詩酒約百倍未能償

過分水關

石磴上不盡青霄如可梯到關闕海近回首楚天低絕  
巘愁飛鳥晴潭落斷霓尋詩聊午憩忽見日輪西

憩楓亭驛

楓關他年世亭餘舊日名驅馳耽午寂林薄送秋聲書  
卷行空載塵心夢未清侵晨猶遠役華髮奈愁生

大烟驛間步即景

步屨緣沙岸牆雞忽亂號村貧茅屋矮驛古木綿高白

石堪垂釣青溪欲染袍  
漁人生理易雙槩小銅槽

遊藕花居

五山皆佛國瀟灑藕花居  
水氣蒸樓潤山光入座虛  
香林松子落小徑竹風徐  
歲月纓微祿烟霞空敞廬

兀坐

兀坐如禪定空齋日又斜  
遊蜂窺硯水鬬雀落庭花  
世事隨風馬年光赴壑蛇  
惟應倚脩竹高咏答韶華

望遠

望遠春還早思親日較長閉門疎世故抱病惜流光買藥囊將罄呼朋酒已香江邊有草閣結綠自垂楊

送王永清之武陽

紫陌消殘雪青天帶晚霞雙鳬辭北極一騎向中華風拂金明水春生博浪沙知君為政日豈有席門家

重陽前一日東余景文

三旬違玉署一枕感秋蓬失譜琴忘操思家藥減功寒烟衝去雁暮雨入飛虫明日重陽酒煩君對菊叢

謁嚴子陵祠

一點微星炯雙厓釣石存  
炎陵銷舊業過客酹清尊  
草竹藏碑碣漁樵問子孫  
羣英如耿鄧千載更誰論

立春前二日下茶洋

客路侵殘歲歸心勝急湍  
寒風吹落日健櫓下層灘  
石過黿鼉走山來劒戟攢  
華堂薦松韭能得預春盤

宿大楓嶺

一宿大楓嶺客懷殊未厭  
夢殘山鳥識衾薄野雲添  
淡

月窺幽戶寒泉近短簷奔馳百年內吏隱幾人兼

春日

春風憐病久分暖到窓紗雉堞朝無雪茅茨物有華驚  
心惟節序快意自生涯南客今將發題書可問家

送人之燕

燕雲七千里之子去匆匆酒盡溪頭上春歸暮靄中桃  
花不受雨榕葉易吟風莫此傷離別男兒欲豎功

戊午除夕泊建溪

守歲嚴城下維舟積水前春風吹短鬢夜雨送殘年獻  
納成何事推敲祇自憐倦來成隱几飛夢五雲邊

宿桃源與同鄉簡主簿志飲

西日銜雲葉南風鼓浪花亭孤留宿鷁帆遠帶歸鴉歲  
月驚為客兒童問到家他鄉逢簡簿又作醉生涯

題畫

漁家在何處松塢枕寒流況與上方近時聞清磬幽柴  
門掩村霧小艇釣江秋因憶尋槎客無緣訪十洲



尋幽

尋幽無此地可以息塵紛  
藤絡懸崖石風迴出洞雲  
因暮耽晚景待月續微醺  
興盡歸來路飄飄麋鹿羣

遊南岩寺抵葛仙洞留題

穿岩越壑訪遺蹤直度虹橋扣石鐘  
雲幕半籠青菡萏砂床長薦紫芙蓉  
仙翁化去名猶在穉子催歸興尚濃  
欲借魯陽揮日劍一川烟水已高春

飲陳侍御風節亭

纖塵飛不到霜臺  
風節亭前長綠苔  
石榻舊携明月坐  
竹窓今為故人開  
客途只合添詩草  
時序都将付酒杯  
回首蒼梧雲黯黯  
與君愁思望蓬萊

題張文獻公祠

何處思賢一繫舟  
芙蓉山下曲江頭  
忠誠貫日千秋鑑  
風度凌雲百尺樓  
野草荒烟迷故宅  
紅蘅碧杜滿新洲  
文章事業垂青史  
直與雙溪萬古流

戲贈李參贊

帝邱居士負崢嶸老去猶為世網嬰幕府三年多釀黍  
新詩一篋半言兵天驕自保豺狼穴朔漠空懷驃騎營  
何日呼韓來稽顙更題長句贈花卿

新秋即事

九城疎雨洗蒸嵐獨上高樓看蔚藍馬挾秋聲馳塞外  
雁將涼信到江南摩娑酒盞酬時節斟酌方書理宿痰  
笑我豎儒糜寸祿安西車馬怯征衫

即事

小聚村墟入柳斜青帘紅檻兩三家插花少婦低臨水  
藉草兒童亂掬沙莫論酒杯防藥餌還尋詩句答春華  
清風自覺生雙腋不待盧仝七椀茶

飲易妙山亭和司空琬韻

風磴逶迤到此亭掀髯長嘯駭山靈漸離故宅林楓暗  
郭隗荒臺野蔓青白水一泓雲作液雜花三月錦為屏  
醉來不話興亡事欲覓青鸞跨杳冥

謁陵

仙衛珠邱王氣深百靈朝護鬱森森風生虎谷調春律  
雲起龍池結畫陰玉匣千年留劒舄金箱終夕動奎參  
天潢正衍無窮澤萬國于今盡獻琛

政和舊徒陳生恪至詢及南峰讀書處

見說南峰舊竹林烟霞長為鎖清陰溪邊茶竈笋穿破  
谷口吟窩花覆深無數青芝生石室千條白瀉下雲岑  
于今苦被塵纓縛祗恐仙源莫再尋

寄鍊上人山房石上梅甚奇

一粟禪林傍古臺洞門長為鎖蒼苔山頭舊雨何人到  
石上寒梅幾度開龕壁光知江月上塔輪鳴聽海風來  
八千里外常飛夢疑我前身是萬回

送南光祿署丞徐麟

曾共西湖醉畫船鏡天花雨憶鳴絃清歌欲墜孤山月  
浩氣真浮五色烟東省身同將倦鳥南都官是半閒仙  
不堪明日河橋別相對秋堂畫燭偏

寄華亭博士傅鼎

酷憐仙跡舊蒼苔  
世網那能一面開  
十載塵埃人易老  
五更風雨夢初回  
春花東閣垂垂樹  
明月西樓灑灑杯  
何似雲間雙白鶴  
數聲相和更歸來

楊京兆惠銀魚

朝來江渚鑿冰痕  
獻罷隨登七貴門  
幾處豆羹尊鮓鮓  
誰家玉食厭羔豚  
霜腴入鼎愁仍解  
雪乳浮杯淡不繁  
撫事獨傷千古意  
重卿今却貴魚餐

寄謝邦實

八年一夜梅溪口水悄沙寒晤語多兩地尚為愁伯道  
半生長似病維摩狂非疇昔惟心在老易侵尋奈別何  
熟計浮沈俱拂意碧山明月負春蘿

人日

人日晴明與物宜負暄忘却宿春遲融和天地新調律  
零落親朋舊寄詩千里客途蓬梗斷一年春事柳梢知  
東風只解欺冰雪不奈霜華點鬢絲

送照磨潭還閩



紫薇幕府似仙家每憶過從早退衙覆地綠雲榕接葉  
拂簷蒼雪荔交花詩成蛭蛭刊脩竹奕罷旗槍鬪細茶  
京國相逢又相別不禁清興遶天涯

黎雲僧舍餞鄭希大

半年不到黎雲室送客偶然來賦詩緣息暫依香座息  
好懷翻為別情移合歡明日非今日晤語新知向舊知  
最是秋風易生感坐來梧葉落參差

曉望

清曉纔披舊黑貂門前物色便相招  
野塘柳待風光動茅屋霜隨日影消  
聽鶴偶來松下逕看泉時倚竹邊橋  
無營更覽能偕俗日被山僧酒伴邀

車盤驛道中

楊柳風柔蕩旅魂耳邊流水咽潺湲  
青山當面似無路黃犢出林疑有村  
途路客懷聊自遣閭閻民瘼不堪言  
長安萬里家千里鳥宿僧歸日又昏

憶江上草亭

每到芳春便憶歸夢中江國舊斜暉渚邊舴艋有時放  
沙上鷗鷺無數飛野興頓從官後減封書更覺病來稀  
年將半百堪惆悵鐘鼎山林意願違

次杭考功闕左池上

禁籞輕雲宿漸飛九重樓閣曙光微螭頭濡筆書言出  
鷄舌含香啓事歸雙闕曉風噓爽氣一池秋水浸寒暉  
令人却憶西征士已有新霜上鐵衣

題思親樓

樓前舊鶴返長松  
松想孤標鶴想容  
極目逝波千種恨  
傷心殘夢五更鐘  
窓臨東郭當秋隴  
簾捲西風自夕春  
如此樓居仙所愛  
與靈休上幔亭峰

春暮懷洞江草堂

近水茅堂舊樂饑  
此時時物正芳菲  
綠楊深巷黃鸝語  
紅槿疎籬粉蝶飛  
春院野雲疑我在  
夜船江月照誰歸  
十年京國成何事  
却被緇塵化素衣

送葉成夫還閩中

南征白雁叫秋旻送爾歸驂憶故人月旦有評慚許劭  
婚姻不斷羨朱陳山間松葉他時醉洞口榴花幾度新  
懷梓况逢多病後夢中魚鳥遞相親

大功德寺

第一湖山大布金當時松柏鬱森森月明高下樓臺影  
風靜東西鐘梵音苔上穹碑春寂寂草荒行殿晝沈沈  
劫灰易見如彈指獨倚雕欄感慨深

寄南光祿卿楊公峻

千尋古柏出霜林萬里長風稱鶴心  
還櫝已完和氏璧  
飾釵那用漢宮金  
春山不礙雲雙屐  
曉鏡何妨雪一簪  
聞說邱園多勝事  
老來筋骨更能任

送鄭司訓歸玉山

三山之外小丹丘  
送客歸來半醉遊  
傾蓋無緣松下問  
逢僧有茗草間留  
夕陽隱地千林暝  
皂筴生風五月秋  
却憶鄭虔情更切  
茫茫雲水一孤舟

曉吟

千里關山叫斷鴻五更鐘鼓報西風酒杯病後如紈扇  
詩興秋來似角弓努力不堪傷老大悲歌何處弔英雄  
閒情無那成推枕又見東方海日紅

送潘司訓璋任海南

五羊城郭瞰環洲君去之官是勝遊碧玉香分蒲澗水  
綠羅陰合荔枝洲洲人慷慨來鮫室海氣依稀見蜃樓  
勾引十年幽討意欲從仙子問浮邱

題李隱君山莊三首

春雲如幄蔭仙家千里尋君拂露華  
傍舍野籬牽樂蔓  
過門流水帶桃花詩情借問誰題竹  
酒渴時聞客喚茶  
長日未將高興盡忽驚林杪鬧樓鴉

癡兒竟日了公家忽憶郊原物有華  
策馬獨來尋舊約  
聽鶯何處覓殘花杜陵禪子能賒酒  
甫里先生解品茶  
坐久不禁詩思攪向君東壁醉塗鴉

狂客惟思醉作家困臨池館挹光華  
青天蕩漾魚跳水  
紅雨闌珊燕蹴花午餉偶留山客飯  
夕涼還赴野僧茶



明朝結束應官去鐘鼓長楊聽曉鴉

東省寮故人

小村山館隔風塵卉服椰冠稱野人五粒寒松蒼石古  
一旗春茗碧甌新非無剡曲堪乘興少有壺天足抱真  
應悔鳴騶出空谷百年何日是閒身

十月八日雪與諸寮倡和

元冥初試發硃鉉屑玉鏤花散渺茫畫裏漁舟歸晚浦  
吟邊風竹瀉寒塘窻涵明月三分白簾絕飛埃半點黃

却笑年來衰懶甚鎮龍羔袖鎖書倉

遊海珠寺

冠山浮動小金鼉擁出蓬壺控巨濤沙渚南來遺識在  
海門東望暮潮高芳洲碧草連蒼靄上界青蓮吐白毫  
醉卧中泠呼不起欲招王子奏雲璈

蒼梧閒眺

雲暗蒼梧曉正閒獨舒懷抱向高臺千年劒在神光現  
三足麋鳴使節來越雋西連山似戟桂江東注水如苔

登臨不盡雄豪興，欲倒鯨川入酒杯。

晚至平南憶別馬叅戎澄

寒江落日背孤城，海月沙頭又欲明。  
千里家鄉殘夢斷，一川烟水暮愁生。  
不辭椰子杯中醉，生怕梅花笛裏聲。  
陡覺別來消瘦甚，馬卿多病更多情。

安博站偶成

跼鵲飛處水如苔，一髮青山認寶臺。  
壓架芙蓉留更舊，葉穿林刺竹長新胎。  
村庄野圃春初動，瘴霧蠻烟午未開。

自是皇恩天廣大平分雨露及蒿萊

過鬼門關

隔林啼鳥亂鳴春纔到山巔又水濱老樹蒼藤含霧雨  
層巒疊嶂蔽星辰穿岩越壑驅車險伐木刊崖取道新  
生過鬼門關下路客懷爭得不傷神

安南王送贐金禮物辭以此詩

歌罷皇華賦式微春風披拂舊征衣菁茅又喜重苞貢  
薏苡何須滿載歸國主儀文將贐意使臣朝暮對天威

金  
卷四  
不恭雖愧心如月留取清光照瑣闥

征婦詞

明月團團出閨中夜夜看願隨明月影一照玉關寒

過姑蘇

遠山如黛接平蕪白鳥分飛裏外湖寶帶橋頭開醉眼  
江南詩景在姑蘇

晚眺

暝色遙隨旅雁羣戍聲動不堪聞可憐天畔登樓眼

不盡南飛一片雲

偶題

朝回困懶坐胡牀無事可消春晝長尋詩不得欲合眼  
啼鵲一聲花雨香

東津岸同沈太史何大行晚眺

青草黃蒿滿野田溪行盡日斷人烟落霞幾抹青螺小  
此是潯南夕照天

柳花

無賴楊花終日飛  
穿簾入座落人衣  
須憐客子傷遲暮  
莫更飛來點鬢絲

題畫

酒筒詩卷足生涯  
更愛茅齋傍水斜  
獨倚東風尋句好  
一溪春綠漲桃花

題小景

三疊秋心萬里流  
蕭蕭黃葉滿汀洲  
籜冠芒屨詩翁瘦  
併作江南一片秋

寄黃京兆澍

聞君伏枕在虛溝我亦經旬病  
裹頭一種黃花風雨裏  
祇應不似故園秋

曉發張灣

黃鸝啼歇曉陰開兩岸垂楊陰  
綠苔葉底輕花君不見  
暖風吹入短蓬來


秋夜詞二首

七寶香臺倚素秋酒闌清切聽  
篋篋八千里外人如夢



月色經年不上樓

手弄雙雙交佩珠不知明月上庭梧秋來正望江南信  
塞雁高飛過五湖



石倉歷代詩選卷四百四十六